

Kaiwo Anatu Na Paulusi

Weo Jemati Na

Filipi

Kaiwo dedung we Filipi

Jemati Filipi mani jemati reantenang Paulusi biauni na nu fuba Eropa foi dine. Bendari Filipi mani wia na nu Makedonia foi. Kaiwo anatu we jemati Filipi nini Paulusi soi na rahida wiatai na aitamu rorong fe fo.

Fi bitoya paria wedaya Paulus soi kaiwo anatu ninai, amani deo dohong mahikai we jematifoi we fio etanatuai wei fo. Deunasa kontai we ambori ewemambiriu tuti etawansa na dadira rorong fo. Denggewasa kontai we enemirorong tewawa kariri Yesusi, wiwo enemirorong dedai fanai tuti wiwo ewati we mantaunsa tera fanai. Deikaririai wesa kontai we deyo, na Allai enerorong denteng foi terai andino wedayasa eweboyari ria Kristusi weo eroasoi fefe, wiwo na etohong kariri Allai ne Hukumifo na mai fo kaha. Kontai Paulusi soi kariri fianai aino inontarai eweboyari ria Kristusi fosa esobuai ria Allai fo, amani dohonsa emirising tuti wedaya enumiruinso ne maifo.

Kaiwo anatu ninai medu kariri mirisingfo, todoni enemirorong mitubaru fo, eweboyarifo tuti kariri todoni inontarai Kristeni nesa etawansa na eroaso Kristusi fo tuti todoni eminohi weinontarai Kristeni fo. Tuti na kaiwo anatu ne kontai deinawi kariri todoni Paulusi enewawu jematifoi fo.

Kaiwo anatu ne deto kutuai tonina:

1:1-11 Kaiwo reantenang fo.

1:12-26 Kaiwo kariri fianai aino Paulusi sodaira fo.

1:27-2:18 Todoni eminohi weinontarai Kristeni fo.

2:19-30 Kaiwo kariri deo demi Timotiusi tuti Epafroditusi we ura we jematifoi.

3:1-4:9 Paulusi deretawansa we etanansiau we inontarai emai kaha fosa fo.

4:10-20 Paulusi tuti ne maniwowirifosa etanatu mahikai we jematifoi.

4:21-23 Kaiwo kafe.

Paulusi urohong mahikai we jemati na bendari Filipi

1 ¹Weo inontarai memararebanai na Kristus Yesusia wa mea na bendari Filipi, kontai mano mewenunggamiei we jemati wa mea tuti mano mewemangfata jemati wa mea.

Kaiwo anatu ninai na yau Paulusi, tuti Timotiusi, Kristus Yesusi ne womingne auru.

²Auenemitawanaifa, kadono tane Dai Allai tuti Seng Yesus Kristusi urohong une bengfo arora we mea tuti urohong mea menumiruinso une maifo.

Paulusi dutang tuti jematifoi we Allai tuti fiafai Allai

³Na rahida yutang tuti mea we Allai mani, ifiafai tuti yohong mahikai pampang wei. ⁴Na enehurorong mirising paria yutang tuti mea kiai pampang. ⁵Yohong mahikai we Allai tonanai, we rahida reantenang metaramio Kaiwo Mahikai kariri Kristusi ne ria antoru fo paria sobu rahida bonini, mefata yau, merurai ria yau mewuwu Sempaisi ne Kaiwone. ⁶Tuti yeitawanai Allai niari fi beng paria na mea tuti na menemirongwai, irosooi we niari tonanai na mea paria sobu werea naya fo, amani rahida Kristus Yesusi daraberahi nai aha ma fo.

⁷Todoni kontaio enehutituai we mea tonanai kiai, weo arohuporo mea kaha, mene tarai toyari raori ikase na rahukanangne. Weo Allai dohong ne bengfo arora we mea kiai, tuti we yau kontai. Dohong ne bengfo arora we yau tonanai na rabuang bo iwatai na aitamurorong fe ninai, kontai na rabuang bo na borai ikahiwa tuti ne Kaiwo Mahikai kariri Kristusi fo tuti yoa imadu tutirai. ⁸Allai deitawanai todoni enehuwawu mea paria, wirow arohuporo mea na wea kaha, mai kariri Kristus Yesusi mantauni enewawu mea.

⁹Nehu fi yutang tuti mea we Allai dinini: Kadono menemiwawu wawera mea fuba sewa aha, tuti menemiwawu kariri aunau wetarai fo na mai aha tuti na mewaitawang ne bengfo. ¹⁰Ambori na ne tonanane mewaitawang kariri ne beng pari fo, ambori menemirongwai mirarebanai tuti metohong sarawa kaha paria rahida Kristusi daraberahi aha ma foi. ¹¹Kadono Yesus Kristusi ne mahikaifo nai woru mea ambori menemirongwai mesi, ambori kaiwasanei kiai efiai Seng Allai tuti etaparandini.

**Dadirao Paulusi sodaira fo wedaya kaiwasa bitoya
etarami Kaiwo Mahikai kariri Kristusi**

¹²Doroio bohine meaine, yeo mewaitawanai na mai weo fianai aino isodairai ninai wedaya Kaiwo Mahikai ne wawu to fong, wirow su to fui kaha, tuti inontarai efau aha etaramioai. ¹³Ampafe kasau we mano

ewaitawang wedua yau na munu Kaisari nei tuti kaiwasa na bendarinei kiai ampa, weo eru yau ma iwatai na aitamu rorong fe ninai weo iwuwu Kristusi fefe. ¹⁴Kontai fi isodairai tonana ne wedaya doroi eroaso Sempaaisi na bendari ninisa etairiri Seng Allai ne Kaiwofo na mambiriu aha tuti na wirow ematai kaha.

¹⁵Tarai, manea etaiririai na enemirorong pirahai we yau, tuti weo eweaiteta we yau. Wape manea kontai etaiririai na enemirorong denteng. ¹⁶Mano etairiri Kristusi na enemirorong mesi nanisa mani, inontaraio enemiwawu yau disa. Tuti ewaitawanaifa we Allai wedaya yau iwatai na aitamu rorong fe ninai ambori ikahiwa tuti ne Kaiwo Mahikai kariri Kristusi fo. ¹⁷Mano siai ehoramaifa na enemirorong mesi kaha fosa, esera we ambori ewe-ewonomi terai. Tuti na enari tonanane, enemitawanaifa we ambori ewedaya yau isodai dadira na aitamu rorong ne pari aha. ¹⁸Wape towewa kaha. Weo ehoramai na enemirorong mesi ete seyewa kontai ki, wape todoni kontaio Kristusi andino ewuwui ne. Ampefe imirising paria.

Yo, tuti todoni kontaio imirising pampang ki. ¹⁹Weo iwaitawanaifa we na mene nadi metutang tuti yau we Allai wai, tuti Nuaninu Mirarebanaio Yesus Kristusi demi ma foi ne fiatane, fiani isodairaifa wedaya yau ikaharai ki. ²⁰Fio yawi weai paria tuti enehutawanaifa mani, wirow imamaya tuti Kristusi na dadira rorong isodairai ninai kaha. Mae kariri reantenangfo paria sobu ninaifa ne, enehutawanaifa we na doni kontaio iwemambiriu, wirow imatai kaha we imadu tuti ne Kaiwone, ambori na fianai aino isodairai ninai, wedayara imereha ete yarang te, wape ambori Kristusi kaiwasa etaparandini. ²¹Weo we yau mani, iminohi yarang pampang mani, mahikai paria, we nana mani iruai Kristusi wonongne pampang. Wape masino etohong aiboi marareha we yau ambori imereha mani, finana mai sewa we yau, weo nana mani, ira iminohi riati. ²²Masino iminohi yarang na nufi ninai mani, irufi bitoya wei aha, tuti wetarai bitoya ki. Ampafe yiri ne doni? Isera wawerahai! ²³Ninai dadira paria we yau, ampafe yeo yohong kariri ne doni? Enehurorong dohong weai paria we itauberahai weru nuneia iminohi ria Kristusi, weo we mantaung yau terai mani, nanai aino beng sewa ne. ²⁴Wape denteng sewa we mea mani iminohi na nunei we ifata mea. ²⁵Iroasoai tonanai, ampafe iwaitawanaifa we todoni kontaio ambori iminohi ria mea kiai we ifata mea, ambori mewemambiriu aha na meroaso Sempaaisi fo tuti memirising pari aha. ²⁶Ampafe memararising paria na Kristus Yesusi, weo fiata yau yarabera yau we mea mau iweboyari ria mea aha.

Paulusi deretawang jematifoi we eroasoia mutu

²⁷Fi fuba pari mani, meminohiwa metohong kariri fianai aino dotu na Kaiwo Mahikai fo kariri Kristusi fo na mai. Ambori ira mau mani iwati

mene meroasoai nanai, ete ira mau kaha mani, tarahuoaifa weo metoaria mutu meweboyari tuti meruraifa we fi beyari, amani metapa inontarai eteiaya Kristusi fosa tuti meroaso Kaiwo Mahikai foa mutu. ²⁸Wiro mematai mano etapa mea fosa fanai. Weo na memataisa kaha tonana ne meteinawiai we ambori esobu karirafo, wape mea mani, Allai mantauni feriri mea ki. ²⁹Weo Seng Allai, na ne bengfo, diri mea weo meroaso Kristusi tuti merariati, nanai tera kaha mae, we mesodai dadirafo kontai wei. ³⁰Weo mea kontai, ninaia mani mehontaifa na fianai aino isodaira ne, amani fio raminde mewatioai we isodairaia fo, tuti metaramioai isodairai pampang ninai.

**Paulusi deunausa we eweboyari tuti
enemirorong tewawa kariri Kristusi**

2 ¹Taweboyari ria Kristusi ambori taenemirorongnei wemambiriu aha. Enewawu tata ambori tanumiruaing ne maifo. Nuaninu Mirarebana nei weriria tata, tuti Kristusi aro tata paria, i wemanang we tata kiai. ²Tonana mani merurai we metohong enehurorongnei mirising na fininai: amani meweboyari na menemiwawu wawera mea wa, na menemitituaitawa, tuti na fi beyario metohong wea wa. ³Dohonao mesera we mewonomi na fi menari wa fanai ete menari fi na menemirongwai dedai fe. Mae menemirorong tewawa tuti metato inontarai siai we ansaino etadai sewa ne. ⁴Tuti dohonao mewati terai we mea fe, mae mewati we inontarai siai kontai. ⁵Na meminohi wau, todoni kontaio menemirorong kariri Kristus Yesusi, weo,

⁶ I fiebai dedai mai toyari Allai,
kontai Allai mantauni dine,
wape deto ne dedai nana kaha,
tuti yutawana kaha.

⁷ Mae sawing ne dedai nanai,
niariri ne tarai toyari woming manei
tuti weinontarai batang kariri inontaraine tata.

⁸ Na minohi toyari inontarai batang nanai,
su enerorongfoia tewawa
tuti dohong kariri te fianai aino Allai demi we niari fo paria
mireha,
tuti mireha sawai na aitaba.

⁹ Nanai aino doni Allai yuaisi dedai sewa
tuti dohong wang mananu fuba pari fo wei.

¹⁰ Ambori na Yesusi wonongfo,
kaiwasa fuba na rorafaisi tuti na nunei,
kontai mano na kofa rorong wausa,
etisangkapa eawemibukafo na arongreafo kiai tuti etatori,

11 tuti emadurai na eboromifo we Yesus Kristusi mani Seng dine, tuti na tonanane etaparanding Dai Allai.

Mene tarai toyari awahao denggararu na rorafaisi we sambewa nunei

12 Ampafe, nehu maniwowiri enehuwawu meawa meaine, mea mani inontarai metarami kaiwo di mea. Na rahida iminohi ria mea wa, nehu kaiwo imadura fo, metaramioai tuti metohong kaririai ampa. Wape fuinina mani iminohi waroi weru mea, ampefe todoni kontai metohong kaririai na mai pari aha. Menari tonanai we Kristusi feriri mea ampa, ampafe merurai we metohong kariri ne Kaiwofo na mematai tuti na mesomi we Allai. 13 Weo Allai mantauni dino dohong mea mewemambiriu tuti memaya we metohong kariri ne maio enea fo ne.

14 Fiani kontai meru fo, meru na menemirorong mirising, wiwo menemiwawera wea fanai tuti mesawa mea fanai. 15 Menari tonanane ambori na meminohifo menemirorong mirarebanai tuti metohong sarawa kaha. Weo meminohi rahang inontarai sasario eminohi na mamantiti rorong fo, wape mea mani Allai ne arikangno metohong sarawa kaha di mea. Tuti na fianai aino menari fo, ewatioi we mene tarai toyari awahao denggararu na rorafaisi, 16 weo meha Kaiwo Kia Arang fo wesa. Menari tonana mani, isobu rang we iboi arohu tuti mea, na rahida Kristusi daraberahi nai aha ma foi. Tuti finanai deinawiaifa we wiwo irurai funoma kaha, mae fi irurai tutirai nanai wetarai ampa.

17 Tarahai emung yaua imereha ki. Imainenang we imereha we mea ambori meroaso Kristusi tuti merariati na mai pari aha. Ampafe ne tarai kariri imami manei sara anggurifeai na korbani etohoni we Allai foi ambori korbani nani mesi, tonanai kontai na imerehane iwedaya mene fi meru we Allai na meroasofo masi kontai, tuti na tonanane nehu rikanei ne tarai kariri angguri imamifi sara korbani nai nani. Tonanai ki, wape iparaise tuti imirising kontai ria mea. 18 Mea kontai mefaraise tonanai tuti memirising ria yau.

Timotiusi tuti Epafroditusi

19 Enehutawanai we na Seng Yesusi ne wiwiaingne, yenatu Timotiusi ahera we mea mau, ambori tarahuo kaiwo na i kariri mene meroasoawa mani ifaraise. 20 Wiwo manei siai enerorong kariri yau kaha, mae Timotiusi meiri kawuru andino enetituai tarai kariri mene maife ne. 21 Weo mano wei nesa kiai mani enemitituai terai we mantaunsa, wiwo we fi Yesus Kristusi dawi wea fo kaha. 22 Wape mewaitawanai we Timotiusi mani inontarai tarasoi dine, weo i yurai paria we deiriri Sengnei ne Kaiwo Mahikai ne ria yau, ne tarai toyari kaisungno meinenang we fiata tamanai. 23 Nanai doni enehutawanaifa we masino iwaitawanai kariri todoni parentane ehutu kaiwo we yaune mani, ambori isahera yenatui

we mea mau. ²⁴Tuti iroasoai fa kontai we na Sengnei ne wiwiaingne, mantaung yau kontaio waroi kahai mae, ambori yontai we mea mau we ituambawa mea ki.

²⁵Mae nehu doro i Epafroditusio metanatui dontai ma we fiata yau nei mani, todoni kontaio yenatui we mea aha mau. Fiata yau kawuru ampa na fianai aino irurai tutira ne, tuti yurai paria ria yau. ²⁶Aro mea paria tuti weansarai we mea, weo deitawanai we mearomikuayai wei paria weo metaramioi we meninangne fefe. ²⁷Tarai we meninang paria adareti mireha. Wape Allai aroi, kontai wirow aroi tera kaha, mae aro yau kontai ambori enehurorongnei wirow fituayai kareraifa fanai. ²⁸Nanai aino doni irurai we yenatui ahera we mea mau, ambori mewatioia mani mefaraise aha, tuti yau kontai iweansarai ahang kaha. ²⁹Metamang wei na Sempaisi wonongfo na menemirorong mirising paria, tuti inontarai toyari Epafroditusi nesa mani metatosa, ³⁰weo deiriri Kristusi wonongne wedayari adareti mireha, wape wirow enetituai we ne tarai bo neng foi kaha, mae enetituaitafo mani weo yiwang mea we fiata yau.

Paulusi medu kariri aunau wetarai fo

3 ¹Ampafe, doro i meaine, todoni kontaio memirising na Sengnei. Wirow nuhuruainso maraba kaha we isoi riwang fianai aino isoi kawuru we meara wa. Weo kaiwo nanai wemambiriu we wedua mea weru ne karirafo.

²Metanansiau we inontaraio etawiai we inontarai eraria Kristusi nesa mani ewesunati. Inontarai etawiai tonana nesa mani inontaraio enari fi karira saine, tuti emasi we ahusa we fiawera. Metanansiau wesa. ³Ea mani ewesunati na ene taraifo terai tuti eroasoai weo sunatifo andino feririsa ne. Wape tata mani, tawesunati ete, tawesunati kaha mae, Nuaninu Mirarebanai sensoni tata tuti wiwiaing tata we tasomi we Allai na tarai. Nana mani ne tarai kariri tataino tasobu sunati tarai foi ne. Tatoari terai na fio Kristus Yesusi niari we tata fo, ampafe wirow taroasoai we na fi toyari sunatifo dino kia maifo we tata fong kaha.

⁴Masino manea eroasoai we na fi mai enari fo, toyari sunati ete fisiai wei fo, aino feririsa ki, nana mani yau isewa aha. Weo yauno yohong kariri fi tonana fo na mai sewa ne. ⁵Weo itaubau nuhu weinontarai Israeli. Iweriria na werengno Benyamini ma tuti inontarai Iberani tarai di yau. Nehu rahida indeatorua mani, iwesunati. Tuti Hukumio Allai dohonai we Musai fo, inari kaririai na mai pariao iweFarisi di yau. ⁶Yohong kariri Hukumi Musai soi fo na mai nanai pariao wedaya irurai we imungtati mano eraria Kristusi nesa, weo eroasoai we andino kia mai wesa ne, wirow na Hukumi Musai soi fo ahang kaha. Tuti titua na ohong kariri Hukumi Yahudi nei mani, yau imasi paria wirow yohong sarawa kaha.

⁷Wape fio raminde nanai ifaraisera i tuti isahuai we kia mai we yau fo, itawinai ampa weo wiefiei we yau ahang kahai, weo ninaia mani iroaso Kristusi fefe. ⁸Wiro finanai tera kaha mae, fiani kontai mantaung yau inari we ambori imararebana fo mani, wirowefiei ahang kaha. Weo fi isobuai aha nina mani, fi mai sewa fine, amani yeroanso nehu Seng Kristus Yesusi. Kristusi wedaya itawing pari fi fuba nani kiai. Finani ne tarai toyari fi piro ikabioi weru yau, ambori isobu Kristusi ⁹tuti iweboyari riati terai. Weo na inari kariri Hukumi Musai soi fo nanai, wirowedaya imararebanai kaha, we ibiriu we imararebanai na fi mantaung yau inariri fo kaha, mae na iroaso Kristusi fo. Nana mani, Allai dohong yau imararebanai tonana ne weo iroaso Kristusi tera fefe. ¹⁰Fio yawi wea ne mani, yeroanso Kristusi, tuti yeo nuhuruainso ne mambiriuo wedayari suwi na marareha rorong fo aha ma fo. Yawiai we iweboyari riati, na fi raminde nanai sodaira fo mani, yau kontai imainenang we isodairai kariri i, tuti masino irufi wei nanai wedaya emung yau imereha, imainenang we imereha wei kontai, toyari i mireha we yau ampa. ¹¹Tuti na tonanane enehutawanai yau kontai isuwi na marareha rorong foi aha ki.

Merurai pampang we mesobu fio inontarai Kristeni ne esera wea fo

¹²Imadu tonanafo wiroweyeo isobu finanai ampa kaha tuti wirowimasi toyari Kristusi kaharai. Wape irurai pampang we isobu fio Kristus Yesusi meinenamaia fo, amani weo yeroansoi na mai pari aha. Weo finanai wedaya tefu yau tuti yuai yau we ne inontarai. ¹³Doroi bohine meaine, yeitawanai kontai we wirowimasi kariri Kristusi kaharai. Wape fi beyario inari mani, kuruhutare fianai aino raminde nanai inaria fo. Tuti irurai terai we iwati to fong weo isobu fianai aino nayai na arohureafe wanai. ¹⁴Nehu tarai toyari wemito we fiwewonong, imito tonanai pampang we ambori isobu fiembaitafo, amani iminohi na Waidani. Weo nanai aino Allai sahu yau na Kristus Yesusi wea ne.

¹⁵Mano taroaso Kristusi na mai ne tata mani taenemitituai tonanai kontai, amani tahurumitare fi siaio raminde nanai taroasoai we ambori feriri tata ne. Wape manei na mea enemutituai siai fea mani, ambori Allai mantauni deinawiai kasau we wau ki. ¹⁶Wape meuremi nayai na fi yeyoai mau ninai fa na mai, amani: Fianai aino tasobuai kawurua fo, tarurai we tatohong kaririai na mai pampang.

¹⁷Doroi bohine meaine, mea kiai metohong kariri inari toa ne, tuti meuremifo nayai na mano enari ne bengfo kariri yau fosa kontai, ambori menari kariri enarifo. ¹⁸Weo kaiwasa siai bitoya eweaiteta we Kristusi tuti etapa kaiwo kariri mireha na aitabafoi. Imadurai bitoya karirisa we mea kawuru ampa, wape imadu riwanai aha mau ninai, na enehurorong fituayai paria wedaya urehukuru deda. ¹⁹Mano tonana nesa mani ambori esuo

rande karira fo ki. Weo erurai esera terai we fi karirao kia mirising wesa fo tuti finani dawi enemirorongfoia weboyari weaia. Tuti emamaya kaririai kaha, mae eboi earomifo weai. Enemitituai we fi nunei terai. ²⁰Wape tata mani inontarai Waidani di tata, tuti rahida neungne tatamang paria we tane Mamparirifoi, amani Seng Yesus Kristusi, we daraberahi na katai nani aha ma fo. ²¹Andino ambori yiwangno tane tarai kerira misuhi nini, awa dedai sambewarai kariri ne tarai bo neng foi. Niari tonanai na ne mambiriu fuba fo, amani ne mambiriuo wedayari yuo fianggeng fuba nini kiai ne.

4 ¹Doroi enehuwawu mea tuti yohong weai paria we iwati mea wa meaine, meaino metohong enehurorong dedai tuti imirising ne. Ampafe, nehu maniwowiri meaine, toyari fi anta itoia nanai, metoaria mutu na Sengnei.

Kaiwo aunau wefuiai

²Weo rarowini Eyodiai tuti Sintikei muru, yenggewa muru we muenemirorong boyari aha, kariri inontaraio muroaso Sengnei. ³Tuti weo nehu maniwowirio rufi tarai ria yau wa wau, yutang wau kontai we fata suru ambori uweboyari aha. Weo ururai ria yau paria we antowuwu Allai ne Kaiwo Mahikai fo fefe, ne tarai kariri Kelemensi tuti kaiwasa siai wei fosa kontai we efata yau tuti erufi ria yau fo. Ewonomife watai na Buku fuba soi kariri inontaraio ambori esobu Waidani fesa nai foi ampa.

⁴Rahida neungne memirising pampang na Sengnei. Tuti yei aha mau yeyo memirising tonanai. ⁵Todoni kontaio meteinaiwai we kaiwasa bitoya wai kiai we inontarai memanang di mea. Weo Sengnei kefang we da ma to. ⁶Na fiani kontaio dohonao wedaya mewearsarai fe, mae mewenadi tuti metutanai terai we Allai. Fianai aino menemitituai wea wa, memadu kaririai we Allai pampang tuti metohong mahikai wei. ⁷Ampafe Allai dohong mea menumiruinso ne maifo, amani ne maio wirowi inontaraine taenemitituai afonsoa kaha fo, ambori ne mai nanai dewawu menemirorongwai tuti menemitituitaiwa na Kristus Yesusi.

⁸Ampafe tonana mani, doroi meaine, menemitituai terai we fi wetarai fo, we fi wewonong fo, we fi mai fo, we fi mararebana fo, we fi mahikaio dohong tata tamirising wea fo, fio tasahuai we fibeng fo, fi masi pari fo, tuti fi kaiwasa etatarai we fibeng fo. Finani kiai terai aino merutawanai tuti menemitituai kariria ne. ⁹Metohong kariri aunau mesobuai ria yau kawurua nanai, amani ne imadurai we mea fo ete na fianai aino mewati yau inari we mea fo. Tuti Allai mano ne maifo weneung nai foi, ambori weriria mea ki.

Paulusi dohong mahikai wesa we fi etohonai wei fo

¹⁰Imirising paria na Sengnei, weo waroi beyari arahio mewati we yau aha ma ninai. Imadu tonanafo wirowi deinawiai we anta mearomiporo yau

kaha, weo iwaitawanai we mearomio yau to, wape wirow mesobu rang we metohong kariria kaha. ¹¹Imadu toninai mau ne, wirow deinawiai we isobu dadira na nehu fi iwepararura fong kaha. Weo isobu aunau bitoya na fi iru ne ampa, we fianai aino isobua fo, fuba ete katui te, finanai we yau nuhuruainso demoyarai. ¹²Kariri todoni tane fifo tuti kariri todoni tane pari fifo nuhuruainsoai kawuru ampa. Na dadira rorong todoni feai kontaio itantuma wea kaha. Nehu fi bitoya ete nehu pari fi, imamosi ete ikahari, isobu aunau kawuru ampa ambori imirising nai. ¹³Weo na fifiani kontai, iwemambiriu we isodai nanai kai, weo Kristusi dohong mambiriu we yaua fefe. ¹⁴Tonanai mae, fianai aino menari we yau ma ninai mahikai kontai, weo mefata yau na nehu dadira rorong ne ampa.

¹⁵Inontarai Filipi wa meaine, mantaung mea mewartawanai na mai ampa, weo na rabuang bo reantenang pari iwuwu Kaiwo Mahikai kariri Kristusi fo we mea nai wai, yontai weru mea na nu Makedonia wai mani, wirow jemati siai bei fiata yau na fi iwepararura fong kaha, mae memeiri mea kawuru. ¹⁶Kontai rabuang bo inayai na bendari Tesalonika foi mani, meaino we beiru teai metanatu we mefata yau ne. ¹⁷Imadu tonanafo wirow yawiai we ambori metohong fi we yau kaha. Mae yeyo ambori mesobu fiembaitafo we riwangno fi menari we yau nana fo.

¹⁸Isobu fio metohonai kai we yau fe ampa, tuti enehutituai weaia mani fuba paria. Fianai aino metanatuai ria Epafroditusi ma ne, isobuai ampa. Ampafe fio iwepararura fo, isobuaia mai ampa. Fio metohoni kiai nini, ne tarai we fio niunsai mampori na korbano nunumi we Allai foi tuti demang weai na enerorong mirising fo. ¹⁹Allai mano isomi wei nei, na Kristus Yesusi dohongno fianai aino mewepararura fo we mea ki. Tutu finanai dohong aroratai we mea fo fuba paria. ²⁰Sambewaraio dadai feai we Dai Allai we fitawafa. Antu.

Paulusi denatu mahikai

²¹Meteikaririai we Seng Allai ne inontaraio emararebanai na Kristus Yesusi wasa, weo yenatu mahikai wesa. Tutu doroi enayai ria yau na nina nesa etanatu mahikai we mea kontai. ²²Allai ne inontarai emararebanai fuba enayai na bendarifi ninisa kiai, reantenang pari mani mano enayai na munu Kaisari nesa, etanatu mahikai we mea kontai.

²³Kadono Seng Kristus Yesusi ne bengfo weriria menumianinuwai kiai.